

UCAPAN PERASMIAN
ACARA COFFEE BREAK SEMPENA HARI RAYA AIDILFITRI
2017
MENTERI KERJA RAYA
YB DATO' SRI HAJI FADILLAH BIN HAJI YUSOF

22 JUN 2017 (KHAMIS)
3:00 PETANG
STESEN MINYAK PETRONAS PSS AMPANGAN 2,
JALAN SEREMBAN - KUALA PILAH (FT51), KM9,
SEREMBAN, NEGERI SEMBILAN.

بِسْمِ اللَّهِ الرَّحْمَنِ الرَّحِيمِ

Terima kasih tuan pengerusi majlis.

Yang Berhormat Dato' Haji Ismail Bin Lasim

Pengerusi Majlis Keselamatan Jalan Raya Negeri Sembilan

Yang Berhormat Tuan Mohd Ghazali Bin Abd Wahid

ADUN Paroi

Yang Berbahagia Dato' Sri Zohari bin Haji Akob

Ketua Setiausaha Kementerian Kerja Raya

Yang Berbahagia Dato' Abdul Razak bin Jaafar

Timbalan Ketua Setiausaha Kementerian Kerja Raya (Dasar dan Pembangunan)

Yang Berbahagia Dato' Dr. Meor Abdul Aziz Bin Hj. Osman

Timbalan Ketua Pengarah Kerja Raya (Sektor Infra)

Yang Berbahagia Dato' Abdul Karim Bin Mohd. Tahir

Pengarah, JKR Negeri Sembilan

Yang Berbahagia Datuk Mohamed Zaini Bin Amran

Ketua Pegawai Eksekutif Selia Group

Rakan-rakan Media,

Dif-dif kehormat,

Pengarah-Pengarah Kanan, Pengarah-Pengarah Cawangan,
Jurutera-Jurutera Daerah, tuan-tuan dan puan-puan yang dihormati
sekalian.

Assalamualaikum warahmatullahi wabarakatuh,

Salam Sejahtera dan Salam Negaraku Malaysia,

PENDAHULUAN

1. Alhamdulillah bersyukur kita ke hadrat Allah Subhanahu Wa Ta'ala kerana dengan izin dan limpah kurnia-Nya, kita diberi ruang dan kesempatan untuk bersama-sama berhimpun di Acara Coffee Break sempena Hari Raya Aidilfitri 2017 ini. Saya ingin merakamkan penghargaan dan ucapan terima kasih kepada Jabatan Kerja Raya (JKR) kerana sudi mengundang saya seterusnya menyempurnakan majlis perasmian pada petang ini.

KEMPEN KESELAMATAN JALAN RAYA DAN OPS SELAMAT

Dato'-Dato', Tuan Tuan dan Puan-puan Sekalian,

2. Tinggal beberapa hari sahaja lagi umat Islam akan menyambut Hari Raya Aidilfitri. Sebagaimana lazimnya, orang ramai akan pulang ke kampung halaman bagi menyambut perayaan ini bersama keluarga, ibu bapa dan sanak saudara yang tercinta. Sehubungan itu, jumlah pengguna jalan raya dan lebuhraya akan meningkat secara mendadak dan ini secara tidak langsung akan meningkatkan risiko berlakunya kemalangan.

3. Untuk makluman, jumlah kemalangan maut yang direkodkan oleh statistik PDRM pada musim perayaan Hari Raya Aidilfitri Tahun 2016 telah mencatatkan pengurangan kepada 273 kes berbanding 303 kes pada musim perayaan Hari Raya Aidilfitri Tahun 2015. Ini memberikan gambaran bahawa usaha untuk mengurangkan bilangan ini perlu dipertingkatkan pada tahun ini dengan lebih menyeluruh.

4. Kerajaan memandang serius perkara ini dan telah merangka pelbagai program termasuk melancarkan Kempen Keselamatan Jalan Raya Peringkat Kebangsaan menjelang musim perayaan bagi mengurangkan jumlah kemalangan dan kematian di jalan raya.

5. Sebagai langkah bagi menghadapi pertambahan trafik dan meningkatkan tahap keselamatan ketika orang ramai pulang ke kampung, syarikat-syarikat konsesi lebuhraya telah mengumumkan pelbagai langkah tambahan seperti Jadual Perjalanan untuk ke pelbagai destinasi di Semenanjung Malaysia, diskaun tol pada hari-hari tertentu, membuka lebih banyak pondok tambahan di plaza-plaza tol, meningkatkan rondaan

pasukan ronda, menempatkan lebih ramai petugas di kawasan-kawasan rehat dan sebagainya.

6. Kementerian Kerja Raya pula telahewartakan penurunan had laju sebanyak 10 km/j bagi Jalan Persekutuan mulai 18 Jun hingga 02 Julai 2017. Sehubungan itu, had laju bagi Jalan Persekutuan akan diturunkan kepada 80 km/j. Bagi Jalan Negeri, KKR meminta kerjasama pihak berkuasa negeri untuk turut menurunkan had laju daripada 80 km/j kepada 70km/j. Di samping itu, kerja-kerja pembinaan dan penyenggaraan bagi Jalan Persekutuan, Jalan Negeri dan lebuhraya akan diberhentikan mulai 18 Jun hingga 02 Julai 2017 semasa musim perayaan bagi memastikan kelancaran trafik. Namun, kerja-kerja kecemasan dan kritikal adalah dikecualikan. Pihak JKR dan Lembaga Lebuhraya Malaysia (LLM) juga telah menubuhkan pasukan peronda bagi memantau kemalangan dan sebarang kerosakan jalan selain akan memastikan kerja-kerja kecemasan dilakukan dengan segera tanpa gangguan lalu lintas di jalan-jalan persekutuan.

7. Sukacita juga saya ingin maklumkan, kerajaan amat prihatin kepada kehendak pengguna jalan raya. Demi keselesaan pengguna jalan raya sebanyak 21 projek jalan yang melibatkan kerja-kerja pembinaan jalan baru dan menaiktaraf jalan sedia ada

telah diluluskan untuk dilaksanakan pada tahun 2017 yang melibatkan peruntukan sebanyak RM4.896 billion.

8. Dalam menggalakan pertumbuhan ekonomi negara, KKR telah mengenalpasti beberapa lokasi yang mengalami kerosakan jalan yang kritikal dengan menaiktaraf dan menyenggara jalan tersebut menggunakan teknik dan turapan khas seperti Cold in Place Recycling (CIPR) dan bahan turapan berprestasi tinggi seperti Stone Mastic Asphalt (SMA), Polymer Modified Asphalt (PMA) dan Cuplump Modified Asphalt (CMA). Bagi mengurangkan risiko kemalangan terutama di kawasan persimpangan, sebanyak 15 kawasan akan ditambahbaik pada tahun ini. Pada masa yang sama, pihak Kementerian Kerja Raya juga sedang dalam proses membangunkan Pelan Tindakan Dasar Pembinaan Jalan Raya dan Lebuhraya bagi mencapai objektif peningkatan Kecekapan dan Keberkesanan Penyampaian Perkhidmatan Awam.

9. Selain itu bagi memperkukuhkan dan meningkatkan kualiti pembaikan jalan oleh pihak konsesi, Performance Based Contract (PBC) untuk Jalan Persekutuan telah diperkenalkan dimana peringkat pelaksanaan PBC ini telah dibahagikan kepada 2 fasa iaitu fasa pertama PBC untuk Zon Selatan yang dijangka dapat diselesaikan pada hujung tahun 2017. Manakala fasa kedua bagi zon Utara dan Zon Tengah Timur masih dalam penyediaan

dokumen kontrak dan dijangka dapat dilaksanakan sepenuhnya pada tahun hadapan.

10. Pelbagai cara telah dilakukan bagi mengurangkan kadar kemalangan dan kematian di jalan raya. Namun, tanpa kerjasama semua pihak, perkara ini tidak dapat dilakukan dengan jayanya. Justeru saya ingin mengambil kesempatan memohon keperihatinan setiap pengguna jalan raya khususnya para pemandu untuk melaksanakan tanggungjawab memandu dengan berhemah, patuhi undang-undang dan peraturan jalan raya, cermat dan bersikap berhati-hati ketika memandu pulang ke kampung halaman atau destinasi yang dituju. Ingatlah, kita mahu bergembira menyambut Hari Raya dan bukannya berduka dan bersedih kerana ada orang yang disayangi terbabit di dalam kemalangan jalan raya. Saya berharap untuk 'Ops Selamat' ke-11 sempena Aidilfitri kali ini akan memberi kesedaran kepada semua pengguna jalan raya agar sentiasa mengutamakan keselamatan serta bersama-sama untuk mengurangkan kadar kemalangan. Saya percaya Kerajaan boleh meletakkan ratusan kanopi polis, ribuan pegawai polis bertugas tetapi jika sikap kita sebagai pengguna jalan raya tidak mahu berubah, maka setiap tahun kita akan melihat angka-angka lebih kurang sama dengan angka terdahulu.

TANGGUNGJAWAB SOSIAL KORPORAT (CORPORATE SOCIAL RESPONSIBILITY) (CSR)

Hadirin yang dihormati sekalian,

11. Sukacita saya mengumumkan bahawa pada hari ini pihak Jabatan Kerja Raya (JKR) tidak ketinggalan dalam usaha mengurangkan kemalangan dengan mengadakan acara *coffee break* sempena Hari Raya Aidilfitri 2017 ini. Program ini merupakan satu inisiatif JKR dengan kerjasama syarikat konsesi penyenggaraan jalan persekutuan Semenanjung Malaysia melalui tanggungjawab sosial korporat (*Corporate Social Responsibility*) dalam usaha membantu mengurangkan kadar kemalangan jalan raya terutama di musim perayaan ini. Acara *coffee break* bagi tahun ini dilaksanakan secara serentak di 10 lokasi terpilih di sepanjang Laluan Persekutuan bersama syarikat Konsesi Penyenggaraan Jalan.

12. Langkah yang diambil oleh JKR dengan sokongan Syarikat Korporat (Konsesi Penyenggaraan Jalan) ini adalah amat bertepatan dalam usaha untuk mengurangkan kadar kemalangan jalan raya dan kematian sempena Musim Perayaan Hari Raya Aidilfitri 2017.

13. Saya gembira melihat penglibatan pihak swasta dalam program tanggungjawab sosial berkaitan keselamatan jalan raya seumpama ini. Saya merakamkan penghargaan yang tidak terhingga kepada semua syarikat yang terlibat. Saya yakin dengan penglibatan pihak swasta seperti ini akan menjadi sumber inspirasi kepada pihak lain bagi mengadaptasi keselamatan jalan raya sebagai salah satu program Tanggungjawab Sosial Korporat masing-masing.

14. Kerajaan sentiasa menggalakkan dan menyokong inisiatif dan langkah positif yang dijalankan oleh sektor swasta dalam bersama-sama menyemarakkan kempen keselamatan jalan raya. Syabas dan tahniah saya ucapkan dan diharap ianya dapat diteruskan lagi di masa akan datang.

INISIATIF COFFEE BREAK

Hadirin Yang Dihormati Sekalian,

15. Melalui inisiatif acara *coffee break* seumpama ini, pemandu yang menggunakan Jalan Persekutuan berpeluang untuk berehat sambil menikmati secawan kopi secara percuma untuk menghilangkan keletihan dan mengantuk. Saya juga difahamkan

pemandu juga akan diberi sedikit cenderahati, yang diharapkan dapat membantu menambah keceriaan ketika dalam perjalanan ke destinasi masing-masing.

16. Usaha ini walaupun mungkin dilihat kecil tetapi sebenarnya mampu memberi kesan yang besar terhadap pemanduan dan keselamatan jalan raya. Ini kerana faktor penyumbang terbesar terhadap kemalangan jalan raya ialah pengguna jalan raya itu sendiri yang mana ia termasuklah memandu melebihi hadlaju, tidak mematuhi peraturan lalulintas, dan memandu dalam keadaan mengantuk atau tidak mempunyai rehat secukupnya.

17. Justeru, dengan berehat sebentar dan mendapatkan secawan kopi diharapkan dapat membantu pemandu untuk lebih segar dan ceria serta mengembalikan fokus dalam pemanduan. Mudah-mudahan sedikit sebanyak inisiatif ini dapat menyumbang terhadap peningkatan keselamatan di jalan raya. Selain dari itu, terdapat juga beberapa lokasi menarik seperti kawasan pelancongan, riadah, perkelahan dan gerai makanan serta buah-buahan di sepanjang Jalan Persekutuan yang boleh dimanfaatkan oleh pengguna jalan raya. Saya juga memanjatkan doa dan berharap tiada kemalangan yang melibatkan kehilangan nyawa pada musim perayaan ini.

PENUTUP

Tuan-tuan dan Puan-puan,

18. Saya ingin mengucapkan penghargaan dan terima kasih kepada Jabatan Kerja Raya Malaysia, semua Pengarah JKR Negeri, pihak pengurusan syarikat konsesi penyenggaraan jalan, pihak media dan semua pihak yang bersama-sama terlibat sama ada secara langsung atau tidak langsung dalam menjayakan majlis pada hari ini. Syabas dan tahniah diucapkan.

19. Akhir kata, saya ingin mengucapkan Selamat Hari Raya Aidilfitri kepada semua umat Islam di Malaysia. Maka dengan lafaz Bismillahir Rahmanir Rahim, saya dengan sukacitanya melancarkan “Acara Coffee Break sempena Hari Raya Aidilfitri 2017” dengan rasminya.

Keselamatan jalan raya tanggungjawab kita bersama. Pandu cermat jiwa selamat. Ingatlah orang yang tersayang dan Ciptalah Detik Indah Bersama.

Sekian, Wabillahitaufik walhidayah wassalamualaikum
warahmatullahi wabarakatuh.

Terima kasih.